

Statistika Serbow sakskeho kralestwa.

Zestajał dr. *Ernst Muka*.

Wozjewjam tu posledni dzěl statistiki Serbowstwa, kiž wobličenje a wopisanje sakskich Serbow wobsaha. Dokelž pak podložki za njón dla swojeho zdalenja wot lubeje Łužicy z wjetša sam zběrać njemóžach, běch na dobroćiwu pomoc lubych přećelow a wótčincow pokazany, wot kotrychž sym přede wšěm kk. far. H. Imišej w Hodźiju, blidařskemu mištrej J. Młynkej w Zarěču, wučerjam Keřkej z Čornjowa, Šewčikej z Baćonja, Haši z Čornec a studentomaj Kralej z Radworja a Handrikej z Jamnoho za hromadženje a připósłanje materialijow wulki dzak winojty. Ale při wšěm tymle jich přećelnym podpjeranju mějach njemału nuzu, prjedy dyžli ze wšelakich stronow trěbne a žadane podložki a powěsće dostach; a škoda, zo běchu mnohe přeco hišće njedospołniše, hač sebi přejach.

Wot wažnišich staršich a nowišich spisow, kiž pak z cyła pak z dzěla wo sakskich Serbach jednaju, su nimo tych w zawodže do statistiki pruskich hornjołužiskich Serbow naspomnjenych hišće mjenować: Merkel-Engelhardt: Die Erdbeschreibung Kursachsens. — Pölitz, Handbuch der Statistik des Königreichs Sachsen, 1810. — Mittheilungen des k. sächs. Vereins für Erforschung und Erhaltung der vaterländischen Alterthümer. Dresden. 1846. III. — Rys Dziejów Serbo-Łużyckich przez W. Bogusławskiego. St. Petersburg. 1861. — Jahrbücher des Kön. sächs. statistischen Bureaus in Dresden. — Die katholischen Kirchen und Schulen im Königreich Sachsen. Von Jakob Kral-Radibor. Dresden 1876. — Historija serbskeho naroda. Spisaštaj W. Bogusławski a M. Hórnik. Budyšin 1884.

A. Wobličenje sakskich Serbow.

Sakscy Serbja sydla jako domjacy wobydlerjo abo přenjo-bywcy w połnocnej połojcy sakskeje Hornjeje Łužicy k sewjeru wot lužiskich horow w Lubijskim, Budyšskim a Kamjeńskim hamtskim hetmanstwje; jako přibywecy abo přičahowarjo pak su so w nowišim času we wšelakich stronach sakskeho kra-